

7-§.Bo'lish shaklida qayta tashkil etishni amalga oshirishda moliyaviy hisobot ko'rsatkichlarini shakllantirishning xususiyatlari

43. Korxonani bo'lish shaklida qayta tashkil etishda ta'sischilarning qayta tashkil etish to'g'risidagi qaroriga asosan qayta tashkil etilayotgan korxona mol-mulki va majburiyatlarining huquqiy vorisligi haqidagi qoida ifodalangan taqsimlash balansini tuzish uchun qayta tashkil etilayotgan korxona moliyaviy hisobotining miqdoriy ko'rsatkichlarini bo'lish amalga oshiriladi.

Moliyaviy natijalar to'g'risidagi hisobot (2-son shakl)ning miqdoriy ko'rsatkichlarini bo'lish qayta tashkil etilayotgan korxona tomonidan amalga oshirilmaydi.

44. O'z faoliyatini to'xtatayotgan korxona tomonidan vujudga kelgan korxonalar haqidagi yozuv Reyestrda kiritilishidan oldingi kunga bo'lgan holatga ko'ra daromadlar va xarajatlar hisobi schyotlari bo'yicha oxirgi hisobot yilini moliyaviy natijalar to'g'risidagi hisobot elementlari kesimida yopish bilan bog'liq hisobga olish yozuvlari qayd etiladi va taqsimlash balansiga asosan, vujudga kelgan korxonalar kesimida tegishli miqdoriy ko'rsatkichlarni bo'lgan holda yakuniy moliyaviy hisobotni tuzish uchun taqsimlanmagan foyda (qoplanmagan zarar) aniqlanadi.

45. Bo'lish shaklida qayta tashkil etishda qayta tashkil etilayotgan korxonaning joriy faoliyati bilan bog'liq barcha operatsiyalar, shuningdek taqsimlash balansi tasdiqlangan sanadan boshlab o'tgan davrda amalga oshirilgan qayta tashkil etish bilan bog'liq xarajatlar vujudga kelgan korxonalar haqidagi yozuvni

Reyestrda kiritish sanasiga qadar qayta tashkil etilayotgan korxonaning buxgalteriya hisobida va yakuniy moliyaviy hisobotida aks ettiriladi.

46. Bo'lish shaklida qayta tashkil etilgan korxonaning taqsimlash balansi va yakuniy moliyaviy hisobotiga asosan, ushbu BHMSning [45-bandida](#) ko'rsatilgan aks ettirilgan operatsiyalarni hisobga olgan holda, davlat ro'yxatidan o'tish sanasidagi holatga ko'ra har bir yangi korxonaning dastlabki buxgalteriya hisoboti tuziladi.

47. Huquqiy vorislar o'zlari davlat ro'yxatidan o'tgan sanaga bo'lgan holatga ko'ra dastlabki moliyaviy hisobotni tuzishda bo'lish shaklida qayta tashkil etish jarayonida olingan aktivlar, majburiyatlar va boshqa miqdoriy ko'rsatkichlar haqidagi ma'lumotlarni huquqiy vorislik tartibida olingan mol-mulk ta'sischilarning qayta tashkil etish to'g'risidagi qaroriga muvofiq taqsimlash balansida aks ettiriluvchi baholashda, qayta tashkil etilayotgan korxonaning yakuniy moliyaviy hisobotidagi miqdoriy ko'rsatkichlardan kelib chiqib qayd etadilar.

48. Korxonalarni bo'lish chog'ida tarkib toptirilgan ustav kapitali dastlabki buxgalteriya balansida ta'sischilarning bo'lish shaklida qayta tashkil etish to'g'risidagi qaroriga va unda nazarda tutilgan qayta tashkil etilayotgan korxonaning aksiyalari (ulushlari, paylari)ni vujudga kelgan korxonalarning aksiyalari (ulushlari, paylari)ga konvertasiya qilish (ayirboshlash) tartibiga muvofiq aks ettiriladi.

Agar ta'sischilarning bo'lish shaklida qayta tashkil etish to'g'risidagi qarorida vujudga kelgan korxonalarning ustav kapitali miqdorini qayta tashkil etilayotgan

korxonaning ustav kapitali summasidan, shu jumladan bo'lish shaklida qayta tashkil etilayotgan korxonaning o'z manbalari (qo'shilgan kapitali, taqsimlanmagan foydasi va h.k.) hisobiga ko'paytirish nazarda tutilgan bo'lsa, bo'lish shaklida qayta tashkil etish natijasida vujudga kelgan korxonalarning dastlabki moliyaviy hisobotida ta'sischilarning bo'lish to'g'risidagi qarorida qayd etilgan ustav kapitali miqdori aks ettiriladi.

Agar ta'sischilarning bo'lish to'g'risidagi qarorida bo'lish shaklida qayta tashkil etish natijasida vujudga kelgan korxonalarning ustav kapitali miqdorini qayta tashkil etilayotgan korxonaning ustav kapitali summasidan kamaytirish nazarda tutilgan bo'lsa, vujudga kelgan korxonalarning dastlabki moliyaviy hisobotida ta'sischilarning bo'lish to'g'risidagi qarorida qayd etilgan ustav kapitali miqdori aks ettiriladi, o'rtadagi farq esa huquqiy vorislarning dastlabki buxgalteriya balansi «Xususiy mablag'larning manbalari» bo'limida «Qo'shilgan kapital» miqdoriy ko'rsatkichi bilan yangi vujudga kelgan korxonalarning ustav kapitali miqdoriga mutanosib ravishda tartibga solinishi lozim.

49. Agar ta'sischilarning bo'lish to'g'risidagi qarorida nazarda tutilgan ustav kapitalining miqdori korxonalarni bo'lish natijasida vujudga kelgan sof aktivlar qiymatiga mos kelgan bo'lmasa, bo'lish natijasida vujudga kelgan korxonalarning dastlabki buxgalteriya balansi «Xususiy mablag'larning manbalari» bo'limining miqdoriy ko'rsatkichlari quyidagi tartibda shakllantiriladi.

Aksiyalarni konvertasiya qilish vaqtida bo'lish shaklida qayta tashkil etish natijasida vujudga kelgan korxonalarning sof aktivlari qiymati ustav kapitali

miqdoridan ko‘p bo‘lib qolsa, dastlabki buxgalteriya balansi «Xususiy mablag‘larning manbalari» bo‘limining miqdoriy ko‘rsatkichlari sof aktivlar qiymati miqdorida, ustav kapitaliga va qo‘shilgan kapitalga ajratgan holda shakllantiriladi (sof aktivlar qiymatining aksiyalarning jami nominal qiymatidan oshishi).

Agar vujudga kelgan korxonalarning sof aktivlari qiymati ta’sis hujjatlarida qayd etilgan ustav kapitali miqdoridan ko‘p bo‘lib qolsa, o‘rtadagi farq dastlabki buxgalteriya balansi «Majburiyatlar» bo‘limida «Uzoq muddatga uzaytirilgan daromadlar» va «Muddati uzaytirilgan daromadlar» miqdoriy ko‘rsatkichlari bilan manfiy gudvill tarzida tartibga solinishi lozim.

Agar bo‘lish shaklida qayta tashkil etish natijasida vujudga kelgan korxonalarning sof aktivlari qiymati ustav kapitali miqdoridan kam bo‘lib qolsa, o‘rtadagi farq dastlabki buxgalteriya balansi «Uzoq muddatli aktivlar» bo‘limida «Nomoddiy aktivlar» miqdoriy ko‘rsatkichi bilan gudvill tarzida tartibga solinishi lozim.